

lewa leselinyana

LESELINYANA LA LEKHOTLA LA TAOLO EA MOTLAKASE LE METSI LESOTHO



Litho tsa RERA
kopanong ea
ntšetso pele ea
mokhatlo **6**



LEWA kopanong
ea borobeli
ea ESAWAS **14**

Mafapha a motlakase le metsi
a tšoareloa thupelo **3**



9 • Maikutlo a sechaba sa Leribe le Mafeteng ka maemo a litšebeletso

Babali ba khabane,

Ke tumelo ea rona hore babali ba tla tseba ka tse ling tsa tseo Lekhotla le ntseng le li etsa litabeng tsa motlakase, metsi le likhoerekhoere.

Khatisona ena ea leselinyana la Lekhotla la Taolo ea Motlakase le Metsi Lesotho (LEWA) re bua ka tse ling tsa litaba tse ileng tsa etsahala likhoeling tsa Phupu le Loetse 2014.

Leha ele hore leselinyana lena ha le a bua ka tsohle tseo Lekhotla le li entseng, ke tumelo ea rona hore babali ba tla tseba ka tse ling tsa tseo Lekhotla e ntseng le li etsa.

Taba ea ho matlafatsa litsebo tsa mafapha ohle a nang le kobo bohali litabeng tsa motlakase, metsi le likhoerekhoere li bohlokoa. Ka hona mafapha ana a ile a tsoareloa thupelo moo ho neng ho shebiloe lintlha tse kang melaoana ea tsamaiso ea motlakase Lesotho, tsela ea ho reka thepa le litšebeliso machabeng le tse ling.

Lekhotla le boetse la tsoara likopano le sechaba libakeng tsa Maputsoe, Quthing le Mafeteng moo sepho e neng e le ho tsebisa bohle ka mosebetsi oa lona, ekasitana le ho etsa

monyetla oa hore Lekhotla le tle le ikutloele maikutlo a sechaba ka phano ea litšebeliso tsa motlakase, metsi le likhoerekhoere.

Ho feta mona ele ho phethahatsa mosebetsi oa ho bona hore ho na le botsitso le polokeho ea phephelo ea motlakase kahar'a naha, re fana ka thuto e holim'a methati e lateloang ke batho ba ka khahloang ke ho etsa khoebo ea motlakase.

Ka Phupu Lekhotla joaloka ka karolo ea litsi tsa sechaba le ile la tsoaea letsatsi la tsoalo ea Motlotlehi Letsie III. Lipapali, metjeko le lijo tsa Sesotho li bile teng mona, 'me ke tšepo ea rona hore kamoso re tla kopana le mafapha a mang litabeng tsena ho atlehisa mokete ona.

Re le LEWA re tsoetse pele ho busetsa molemo sechabeng ka ho tšehetsa ho phahamisoa ha thuto ka Sekolong se Seholo sa Sechaba (NUL) ka ho fana ka likhau ho ba ipabotseng lithutong tse itseng.

Tikolohong teng LEWA e le setho sa Mamekhatlo ea Makhotla a Taolo ea Motlakase Afrika e Boroa (RERA) e bile teng liphuthehong tsa likomitjana le likomiti tsa RERA Soatsing ka Phato.

Ho feta mona Lekhotla le ile la ba teng phutheho ea selemo le seboka sa Mokhatlo oa Taolo ea Metsi le Bohloeki Tikolohong ea Afrika e Boroa le Bochabela (ESAWAS) e neng e le Mozambique ☐

Ntoi Rapapa
Mookameli

Comments Email: secretary@lewa.org.ls

Baemeli ba mafapha a motlakase le metsi ba tsoareloa thupelo

Hona thupelong ena Nexant e ile ea tšetleha litaba tsa eona holim'a tseo e li fumaneng ha ba hlahloba melaoana e tsamaisang phephelo motlakase ea Lesotho (Lesotho Transmission Code).

Lekhotla la Taolo ea Motlakase le Metsi Lesotho (LEWA), ka tšehetso ea Mokhatlo oa Lithuso Machabeng oa 'Muso oa Amerika (USAID), le ile la tsoara thupelo bakeng sa ba nang le kobo ea bohali litabeng tsa motlakase le metsi ho tloha ka la 28 – 31 Phuptjane 2014, Maseru.

Thupelo ena e ne e tsamaisoa ke ba setsi sa Nexant se tsoang hona Amerika.

Morero oa thupelo ena e ne e le ho matlafatsa tšebetso ea Lefapha la Matla, K'hamphani ea Lesotho ea Motlakase (LEC), K'hamphani ea Metsi le Likhoerekhoere (WASCO), Sekolo se Seholo sa Sechaba (NUL) le ba bang ba nang le kobo'a bohali litabeng tsa motlakase le metsi, har'a tse ling, ka mahlale a tšebeliso 'moho lipakeng tsa 'muso le khoebo, theko ea thepa le lisebelisoa machabeng le litumellano tsa khoebo.

Hona thupelong ena Nexant e ile ea tšetleha litaba tsa eona tsa tseo ba li fumaneng ha ba hlahloba melaoana e tsamaisang phephelo motlakase ea Lesotho (Lesotho Transmission Code). LEWA e ne e ile ea kopa Nexant ho hlahloba melaoana ena pele e ka ananeloa ke Lekhotla.

Puong ea hae ha a bula thupelo, Mookameli oa LEWA Assoc. Prof. Ntoi Rapapa o ile a leboha Nexant haholo ka tšebetso ea eona kaha ba ile ba tseba ho boela ba tla hape ho fana ka tsebo ea bona ho baemeli ba mafapha a fapakaneng kaha e na e ne le phutheho ea bone ea mofuta oa eona e tsoaroang ke ba feme eo Lesotho.

“Ke leboha Nexant ka tšehetso ea e faneng ka eona lithupelong tsena tsa ho fana ka koetliso ho ba nang le

kobo ea bohali. Ke tšepo ea ka hore thuto ea thupelo ena le tse tlileng pele ho eona, li tla matlafatsa phano ea litšebeliso haholo”, a supa joalo Assoc. Prof. Rapapa.

O boetse a bua haholo ka lithupelo tse ileng tsa tsoaroa



Ba bang ba batho ba neng ba le thupelong ba ile ba chakela setsi sa motlakase oa letsatsi Moshoeshe I, Mazenod.

3 ho hopotsa ba neng ba le teng hore litaba tsena li qalile kae 'me li nyallana joang. Assoc. Prof. Rapapa a boela etsa kakaretso ea lintlha khohle tsa lithupelo tse fetileng bakeng sa ba neng ba qala ho ba teng.

E mong oa barupeli, Monghali Onton Tony Iskarpotyoti, o ile a leboha Lekhotla ka ho qala le ho qeta tšebetso ena ea lithupelo 'me a bontša hore hona ke sesupo sa boikitlaetso ka lehlakoreng la lona ho ntlafatsa bohle.

O bile a khothaletsa ba bileng teng ho buisana le bona ele barupeli 'me ba nke monyetla ka ho botsa lipotso e le hore ba tle ba fumane kutloiso e tebileng nakong ea phutheho.

Phutheho ena e nkile matsatsi a mane 'me ka letsatsi la bohlano ho ile hoa eteloa setsing se fanoeng ke 'muso oa Japan sa phehlo ea motlakase ka letsatsi se boemelong ba lifofane ba Moshoeshe I ☐

Baithuti ba ipabotseng ba NUL ba abeloa likhau tsa LEWA

Lekhotla la Taolo ea Motlakase le Metsi Lesotho (LEWA) le ile la fana ka likhau ho baithuti ba ipabotseng selemong sena sa 2014 ba Sekolo se Seholo sa Sechaba (NUL) moketeng oa selemo le selemo oa likapeso o neng o tšoaretsoe hona NUL, Roma ka la 27 Phato 2014.

LEWA e tsoetse pele ho tšehetsa NUL e le karolo ea lenane la Lekhotla ea ho khutlisetsa molemo sechabeng litabeng tsa thuto, hape e le ho khothaletsa baithuti ho sebetsa ka thata le hore ba be le thahasello ho ithuta lithuto tse amanang le taolo ea litšebeliso.

Baithuti ba amohetseng likhau tsena e bile Tšoeunyane Moseli Frank ea ipabotseng ka ho fumana 2(i) thuto tsa hae tsa B. Engineering Electronics, Nwahara Ugochinyere eo le eena a fumaneng 2(i) lithutong tsa hae tsa Biology and Chemistry, le Thabiso Godfrey Mohapi 'moho le Taole Mohlahatsa bao ka bobeli ba atlehileng ho fumana sehlopha sa pele (First Class) thutong tsa bona tsa Economics.

Lilemong tse peli tse fetileng, LEWA e ile ea fana ka likhau tse tharo mekhahlelong ea Engineering, Economics le Biology le Chemistry. Selemong sena, LEWA e fane ka likhau tse 'ne kaha baithuti ba ba babeli ba Lefapha la Economics ba ile fumana sephetho se tsoanang tšebetsong ea bona.

LEWA e tsoetse pele ho tšehetsa NUL e le karolo ea lenane la Lekhotla ea ho khutlisetsa molemo sechabeng litabeng tsa thuto, hape e le ho khothaletsa baithuti ho sebetsa ka thata le hore ba be le thahasello ho ithuta lithuto tse amanang le taolo ea litšebeliso.

Ha a buoa lebitsong la bo-mphato oa hae ba fumaneng likhau tsa LEWA selemong sena, Nwahara Ugochinyere o ile a bontša thabo e khohle le teboho ho LEWA ha e ile ea ba thoholetsa le ho ba khothaletsa ho sebetsa ka thata hore ba tle ba qeteletse ba fumane likhau.

"Ha re na mantsoe a lekaneng a ka hlalosing thabo le motlotlo tsa rona ka letsoho le bulehileng la LEWA. Re ne re tsepamisitse mahlo a rona likhaung tsena, 'me ra sebetsa ka thata selemo ho pota 'me joale re khola litholoana tse monate. Re leboha LEWA ka tšehetso ea eona le thoholetsa," a rialo Ugochinyere ☐



E mong oa baithuti Tšoeunyane Moseli Frank ea amohetseng khau ho tsoa ho Lekhotla.

Leselinyana lena le hatisoa hang kamor'a likhoeli tse tharo. Litaba tsohle tse ka har'a lona li ikarabella ho Lekhotla la Taolo ea Motlakase le Metsi Lesotho.

© 2014 Lekhotla la Lesotho Motlakase le Metsi. Mang kapa mang ea ka khahloang ke ho sebelisa litaba tse

Borali le khatiso: The Age Multimedia Publishers

LEWA e fumaneha : Lesotho Electricity and Water Authority,
7 Floor, Moposo House, Kingsway, Maseru, Lesotho
Tel: +266 22 312479 • Fax: +266 22 315094
Email: secretary@lewa.org.ls • Website: www.lea.org.ls
Postal Address: Private Bag A135, Maseru 100 – Lesotho, Southern Africa.

Litho tsa RERA li kopana ho ntšetsa pele mokhatlo

Litho tsa 'Mamekhatlo oa Makhotla a Taolo ea Litsi tsa motlakase Afrika e Boroa (RERA) li ile tsa tšoara liphutheho tse 'maloa tsa Likomiti le Likomitjana Soatsing, ho tloha ka la 21 ho isa la 29 Phato 2014 ele ho ntšetsa pele Moralo oa Tšebetso ea 'Mamekhatlo oa 2013-2017.

Liphutheho tseo li ile tsa buloa ka molao ke Mookameli oa Lekhotla la Taolo ea Matla la Soatsing (SERA) Monghali Vusumuzi Mkhumane, ha Mongoli oa Phethahatso oa RERA Monghali Elijah Sichone eena a ile a tsamaisa lintlha tseo ho neng ho buisanoa ka tsona liphuthehong tseo.

Hajoale RERA e na le likomitjana tse tharo. Tsona ke ea Molao (Legal subcommittee), ea tsa Moruo (Economic Regulation subcommittee), le ea tsa Motlakase (Technical Regulation sub-committee). Ngoahola ho ile ha thehoa sehlopha se shebaneng le Litaba tsa Tšireletso ea Basebelisi ba Motlakase le Liphatlalatso (Task Team on Consumer Services and Communication).

Likomitjana tsena li etsa likhohale tso tse isoang likomiting tse kholo tse tharo tsa RERA. Komiti ea pele ke ea litaba tsa Matlafatso ea Litsebo tsa Litho tsa 'Mamekhatlo le Phapanyetsano ea Litaba (Capacity Building and Information Sharing).

Komiti ea bobeli ke ea Litaba Tsa Maano, Melao le Melaoana ea Taolo ea Motlakase (ESI Policy, Legislation and Regulations). Komiti ea boraro ke ea Litaba tsa Tšebeliso-Moho ea litho tsa RERA (Portfolio Committee Regional Regulatory Cooperation).

Liqeto kapa likhohale tso tse tsoang likomiting tsena li fetisetsoa ho Komiti e Kholo ea Phethahatso e bopiloeng ka Baokameli ba Makhotla (Executive Committee).

Liratsoaneng tse katlaase mona ho hlalisoa tse ling tsa liqeto tse ileng tsa etsoa hona liphuthehong tse neng li tšoaretswe Soatsing. Ho hlake ho 'mali hore ho bile le liqeto tse ling tse ileng tsa etsoa, 'me tsena tse hlalisoang mona ha se hobane li le bohlokoa ho feta tse ling tse sa hlalisoang, empa e molemong oa ho ruisa babali tsebo.

Litabeng tsa ntšetso-pele ea litsebo/boiphihlelo ba 'Mamekhatlo le Litho tsa ona tse hlalhang kahar'a Moralo oa Tšebetso oa RERA, khohale tso e bile hore litho tsa RERA li fane ka maikutlo holim'a maoala a ka lateloang ho fihlela taba-tabelo eo ea litho tsa Mokhatlo. Ho feta mona ho entsoe khohale tso e hore ho lokisoa mokhoa oo ka ona Balula-litulo ba Liboto tsa Litho tsa RERA ba ka kopanang ho thakelana ka malebela.



Baemeli ba bileng teng phuthehong ea Litaba tsa Tšireletso ea Basebelisi ba Motlakase le Liphatlalatso.

6 Ntlheng ea koetliso teng ho ile hoa etsoa khohale tso e hore basebetsi ba Litho tsa RERA ba sa sebetseng mafapheng a litaba tsa motlakase ka kotloloho letsatsi le letsatsi ba ke ba ruisoe tsebo e tomanyana ka tsa motlakase. E le ho fihlela sena, ho ile hoa etsoa khohale tso e hore setsi sa Phehlo ea Motlakase le Koetliso sa Kafue se Zambia le Bongoli ba RERA, ba tlatsitsoe ke Komitjana ea Molao ba rale Tokomane ea Tumellano ea Tšebeliso-Moho ntlheng ea koetliso.

Tumellano eo ena e lokela e tle e lekoe ke Litho tsa RERA pele e kena tšebetsong. Tello ke hore litho ka moka li tla romela basebetsi ba joalo Setsing sa Kafue ho ea ithuta haholoanyane ka motlakase ha lichelete li lumela.

Tabeng ea mosebetsi oa RERA ho ile ha etsoa khohale tso e hore tlaleho ea tseo Mokhatlo o li fihletseng ka 2014

Mekhoa ea ho fumana lengolo la tumello ea ho fana ka litšebeletso

Lekhotla la Taolo ea Motlakase le Metsi le entse tokomane e lokolisang litaba tse joalo 'me e hlalositsoe ka bokhutšoanyane katlaase mona.

Ho latela molao o thehileng Lekhotla la Taolo ea Motlakase le Metsi (LEWA), o hlomathisitsoeng, khaolo ea mashome a mahlano (50) e hlalosa hore mang le mang ea ka bang le thahasello ea ho fana ka litšebeletso tse laoloang, o lokela ho etsa kopo ho Lekhotla ea ho fuoa lengolo la tumello (laksense).

Kopo e lokela ebe ka tsela eo Lekhotla le tla bona e nepahetse ho latela melao le melaoana e tsamaisang litaba tsena. Kopo e lokela e felehetsoe ke litjeo tsa kopo tse behiloeng ke Lekhotla.

Lekhotla le entse tokomane e lokolisang litaba tse joalo 'me e hlalositsoe ka bokhutšoanyane katlaase mona.

Pele mokopi a ka fuoa lengolo la tumello, o lokela hore a be le boiphihlelo lintlheng tse latelang: a be le boemo bo lekaneng ba lichelete, a be le litsebo litabeng tsa marang-rang a motlakase le litsebo tsa ho tsamaisa khoebo ea phephelo ea motlakase.

e tle e romeloe ho litho ho e hlaloba. Taba eo ea ho romela litokomane e tla boela e etsoa hape le ka Lenane la Tšebetso le Likhakanyo tsa Lichelete tsa RERA.

Joalokaha ho ile hoa hlalosa maselinyaneng a fetileng, litaba tsa tšireletso ea basebelisi ba motlakase li bohlokoa haholo ho RERA. Kahoo, khohale tso e bile hore Komiti e Kholo ea Phethahatso ea RERA e tle e fane ka tumello ea hore ho thehoe komitjana e holim'a litaba tsena. Komitjana eo e hopoletsoe hore e tle e sebetse tlas'a ea Tšebeliso-Moho ea Litho tsa RERA e ntseng e le teng kaha eo e se e ntse e sebetse litaba tse joalo.

Litho tsa RERA tse ling tse neng li emetsoe liphuthehong tseo ebile LEWA (Lesotho) ECB (Namibia), CNELEC (Mozambique), IRSE (Angola) (ZERA (Zimbabwe) ERB (Zambia), EWURA (Tanzania), SERA, (Soatsing), NERSA (Afrika Boroa) le MERA (Malawi) □

sebelisetsa moo setsing sa pehlo; le (4) Moo motlakase o fehloang o fepeloang moji ea kahare ho jarete le setsi sa phehlo ea motlakase.

Kopo ea lengolo la tumello e lokela ho felehetsoa ke litokomane tse fapaneng, ho latela boleng ba kopo ka 'ngoe le boitsebiso ba mokopi.

Boemong boo eleng hore kopo e etsoa ke K'hamphani, kopi ea libuka tsa lichelete (financial statements) hammoho le tlaleho ea Mohlahlobi oa Libuka (Auditors report) tsa selemo se holimo le tsa lilemo tse peli tse fetileng li lokela ho tsamaisoa le kopo.

Litokomane tse bontšang boemo ba mokopi ba lichelete li lokela ho fanoa le tsona. Moo ebang mokopi ke K'hamphani e hlahlamang e kholo (subsidiary company), libuka tsa lilemo tse peli tse fetileng, hammoho le tlaleho ea Mohlahlobi le boemo ba mokopi ba lichelete li lokela ho tsamaisoa le kopo.

Moo teng e bang mokopi ha se K'hamphani, libuka le litokomane tsohle tse supang boemo ba lichelete, hammoho le tlaleho ea Mohlahlobi oa libuka lia hlokahala.

Litaba le litokomane tse ling tse hlokehang haeba kopo ele ea tumello ea phehlo ea motlakase (Generation)

- Tlhaloso ea sebaka seo setsi sa phehlo se tlang ho ba ho sona;
- 'Mapa oa sebaka seo;
- Lebitso la setsi;
- Palo ea mechini ea phehlo e tlang ho sebetsa;
- Tlhaloso ea hore na tšebetso ea phehlo e lebeletsoe ho qala neng;
- Tlhaloso ea hore na ka selemo e kaba motlakase o mokae o lebeletsoeng ho fehloa ka lilemo tse hlano, ntle le motlakase o sebelisoang setsing;
- Nako e lebeletsoeng hore setsi se be se ntse se sebetsa;
- Bokhoni (capacity) ba mochini ka bo mong ba phehlo;
- Tlhaloso ka lithapo tse kopanyang setsi ho lithapo tsa motlakase; le
- Tlhaloso ea mokopi mabapi le hore na o tla nka mehato efeng ele ho ananela lipehelo tsa lengolo la tumello.



Ho kena tšebetsong ea phepho ea motlakase ho hloka litsebo le chelate.

Litaba le litokomane tse ling tse hlokehang haeba kopo ele ea ho tsamaisa motlakase ka lithapo tse kholo (Transmission)


- Tlhaloso ea libaka moo lithapo li tlang ho feta teng;
- 'Mapa oa marang-rang;
- Lithapo tsa motlakase li lokela li tsoaue ho latela matla a motlakase a jeroeong ke lithapo tseo;
- Boitsebiso ba motho eo ho lebeletsoeng hore motlakase o tla fumaneha hotsoa ho eena lilemong tse hlano;
- Libaka kapa litsi tsohle tseo mokopi a lebeletseng ho reka motlakase hotsoa ho tsona;
- Bongata ba motlakase bo lebeletsoeng;
- Tlhaloso ka libaka moo lithapo tse kholo tse tsamaisang motlakase li tlang ho kopana le tse ling teng;
- Khakanyo ea tlhoko ea matla le motlakase;
- Litokiso tse entsoeng ka litšebeletso tsa limithara; le
- Tlhaloso ea mokopi mabapi le hore na o tla nka mehato efeng ele ho ananela lipehelo tsa lengolo la tumello.

Litaba le litokomane tse ling tse hlokehang haeba kopo ele ea ho tsamaisa motlakase ka lithapo tse kholoanyana le Phepho (Distribution and Supply)

- Tlhaloso ea libaka moo marang-rang a lithapo tsa motlakase a tlang ho feta teng;
- Mokhoa oo mokopi a rerileng ho o sebelisa ho tsamaisa motlakase libakeng tseo le phepho ea ona;
- Lintlha ka setsi se teng le seo ebang ke hona se tla ba teng;

- Tlhaloso ea hore na marang-rang a tsamaisang motlakase ka lithapo tse kholoanyana (distribution for supply) a hoketsoe marang-rang a tsamaisang motlakase ka liphaephe tse kholo (Transmission);
- Boitsebiso ba motho eo ho lebeletsoeng hore motlakase o tla fumaneha hotsoa ho eena lilemong tse hlano;
- Tlhaloso ka matla a jeroeong ke lithapo tse fetisang motlakase molemong oa phepho;
- Likhakanyo tsa likhokelo tse tlang ho etsoa;
- Matla a motlakase a lebeletsoeng hotsoa ho setsi sa phehlo lilemong tse hlano tse latellanang;

- Khakanyo ea tlhoko ea motlakase ea selemo le selemo lilemong tse hlano; le
- Khakanyo ea motlakase le matla tse tlang ho rekisoa selemo le selemo lilemong tse hlano.

Litaba tsena tsa kopo li ka fumaneha liofising tsa Lekhotla le marang-rang a lona. Litokomane tsa molao tse tšehelitseng litaba tsena ke Lesotho Electricity Authority Act 2002 e hlomathisitsoeng le Lesotho Electricity Authority (Application for Licence) Rules, 2012 

Sechaba sa Leribe, Mafeteng se bua le Lekhotla ka litaba tsa litšebeletso

Likopanong tsena tse peli, ba neng ba le teng ba ile ba fua monyetla oa ho hlahisa maikutlo a bona mabapi le litšebeletso tse fanoang ke LEC le WASCO, tseo ho ea ka bona li sa khotsofatseng.

Lekhotla la Taolo ea Motlakase le Metsi (Lekhotla) le ile la etela basebelisi ba litšebeletso tsa motlakase le metsi literekeng tsa Leribe le Mafeteng.

Ketelo ena e ne e le hore Lekhotla le itsebahatse le ho ruta sechaba ka lona, haholo lintlheng tse ba amang ele basebelisi ba litšebeletso ba letsatsi le letsatsi.

Likopano tsena li ile tsa tsoaroa ka sebopeho sa lipitso Maputsoe ka la 31Phupu le Mafeteng ka la 05 Loetse ka tatellano selemong se holimo.

Ba bileng teng lipitsong tsena ka bobeli, e bile marena, bahlanka ba 'Muso, bahoebi, mak'hanselara, boemeli ba baji ka kakaretso, K'hamphani ea Lesotho ea Motlakase (LEC), K'hamphani ea Metsi le Likhoerekhoere (WASCO) le boemeli ba liofisi tsa Botsamaisi ba Litereke.

Literekeng tsena tse peli, Lekhotla le hlalositse hore ho bohlokoa haholo hore sechaba se tsebe le ho utloisisa ka mosebetsi oa Lekhotla litabeng tsa taolo ea litšebeletso hore se e hlalohanye ho mosebetsi oa phano ea litšebeletso e leng oa WASCO le LEC.

Likopanong tsena tse peli, ba neng ba le teng ba ile ba fua monyetla oa ho hlahisa maikutlo a bona mabapi le litšebeletso tse fanoang ke LEC le WASCO, tseo ho ea ka bona li sa khotsofatseng.

Pitsong ea Maputsoe, Lekhotla le ne le emetsoe ke Mookameli oa lefapha la Litaba tsa Basebelisi ba litšebeletso le tsa Liphatlalatso, Monghali Shao Khatala le motlatsi oa hae Mofumahali 'Machabalala Koatsa.

Pitso ena e ile ea tsoaroa ke Lekhotla kamorao hore Morena oa Ha Nyenye Maputsoe Morena Makara Nyenye a etse kopo e joalo. Kopano ena e reretsoe hore Lekhotla le ke le hlalose ka boemo ba litšebeletso tsa LEC le WASCO bo hloabaetsang.

Mok'hanselara oa Ha Nyenye, Monghali Mohlapholane Rantši, o ile a amohela Lekhotla le sechaba sa Maputsoe ka ho leboha Lekhotla ka ketso ea ho amohela kopo ea hore le be teng ho hlalose sechaba ka boemo bo tlase ba litšebeletso.

“Re na le tlhoko ea litsi tse rekisang motlakase kahare ho toropo ea Maputsoe. Hoba le tšubuhlellano sebakeng



Ba neng ba nkile karolo pitsong e neng e tsoaretsoe Mafeteng.

se le seng sa ho noesa makoloi, ea batho ba rekang motlakase ka mehla. Ka nako e 'ngoe re letsetsa le baamani le rona ba Maseru hore ba re rekele motlakase ebe ba o romella ka li sms", Monghali Mohlapholane Rantši a hlalosa.

Qholotso e 'ngoe eo batho ba Ha Nyenye ba ileng ba bua ka eona ke ea hore litšebelsetso tsa motlakase, metsi le likhoere-khoere li fumaneha ka boima, ebile phephelo ha e le teng e khaoha khafetsa. Lekhotla le ile la hlalosa hore le se le ile la nka bohato ba ho hlahloba marang-rang a LEC moo ho bonahetseng libaka tse ling li na le mathata. Lekhotla le supile hore le tla ke le kopane le litsi tse amehang ho buisana ka litaba tsa litšebelsetso ea metsi le likhoekhoere. Le ka WASCO ho tla etsoa joalo.

"Kahar'a litokomane tse 'maloa tse hlahisitsoeng ke Lekhotla ho na le tsa Lipehelo tsa Boleng ba Litšebelsetso le Phephelo tseo LEC le WASCO li lokelang hore li sebetse li ipapisitse le tsona. Ho feta mona, Lekhotla le ntse le etsa litokiso tsa ho hlahloba marang-rang a WASCO ele ka morero o tsoanang", Mofumahali Koatsa a hlalosa.

Taba e 'ngoe e hlahisitsoeng ebile hore na mabaka a ho patalisa baji lipatala tsa khoeli le khoeli (standing charge) tsa litšebelsetso tsa metsi ke a feng. Lekhotla le hlalositse hore litjeo tsena li pataloa khoeli le khoeli molemong oa ho beha marang-rang a WASCO boemong

bo nepahetseng ka linako tsohle. Taba e 'ngoe e ileng ea hlaloso ke ea hore leha moji a sa sebelisa metsi, marang-rang ona a ntse a lahla boleng ba teng, ke ka hona a lokelang hore a lule a nepahetse.

Lekhotla le ile la tsoara 'moka o mong ka sebopelo se tsoanang Mafeteng, moo teng Lekhotla le neng le emetsoe ke Raliphatlatso Mofumahatsana Makhosi Makhobalo le Mofumahali Koatsa. Lintlha tsa sehlooho mona e ne e le bohlokoa ba ho nka karolo litabeng tsa ha Lekhotla le nonya sechaba maikutlo ha le etsa liqeto, methati e lokeloang ho lateloa ha molli a hlahlela tletlebo ho Lekhotla, le Lipehelo tsa Boleng ba Litšebelsetso tsa Motlakase, Metsi le Likhoere-Khoere (QOSSS).

Seterekeng sa Mafeteng, Lekhotla le ile la amoheloa ke Moemeli oa Ofisi ea 'Musi oa Setereke Monghali Motšoeneng Tiheli. Liqholotso le maikutlo a hlahileng Maputsoe a boetse a tekoe ke Sechaba Mafeteng 'me Lekhotla la arabela ka tsela e tsoanang.

Mofumahatsana 'Makhobalo, o ile a kothaletsatsa bohle ba neng ba le teng Mafeteng hore ba lule ba nka karolo litabeng tsa Lekhotla tse ba amang. Taba ena e ile ea hlaloso ele tsela eo ka eona Lekhotla le ka tsebang ka litaba-tabelo tsa baji le ho netefatsa hore litšebetso tse fanoang ke LEC le WASCO ke tse khotsofatsang le hore na sechaba se tseba ha kae ka Lekhotla

LEWA e keteka letsatsi la tsoalo la Khosi Rabasotho

E bile letsatsi le monate haholo la menyakoe ho tlotlisa Khosi Rabasotho.

E le ho keteka letsatsi la tsoalo la Motlotlehi Letsie III ha a ne a eba lilemo tse 51, basebetsi ba Lekhotla la Taolo ea Motlakase le Metsi Lesotho (LEWA) ba ile ba ikopanya ho etsa menyakoe ho tsoaea letsatsi lena ketsahalong e ileng ea eba ka la 16 Phuptjane 2014 liofising tsa LEWA.

Morero e ne e le hore basebetsi ba ithere ka lihlopha tsa bobeli ba tle ka seo ba ka se etsang ho bontša tsebo le boiphihlelo ba bona litabeng tse amanang le nalane ea Lesotho le bophelo ba Motlotlehi har'a tse ling.

Tsena ba ne ba ka li bontša ka pina, motjeko oa bochaba, lijo tsa Sesotho kapa tse ling.

E bile letsatsi le monate haholo la menyakoe ho tlotlisa Khosi Rabasotho.

Har'a tse ileng tsa etsoa letsatsing leo e bile mokhibo, ho kalla, tsoantšiso tse bontšang tsela ea Basotho ea ho etsa lintho tse joaloka ho raha moritšoana.

"Ruri letsatsi lena le bile monate haholo 'me la bopa bonngoe le lerato la naha ea hara rona re le basebetsi ba LEWA. Re lakaletsa Motlotlehi bophelo bo bolelele le katleho linthong tsohle", ho buile joalo e mong oa bahlophisi ba moketjana ona Raliphatlatso oa LEWA, Mofumahatsana 'Makhosi Makhobalo.

Letsatsing lena, basebetsi bohle ba ne a apere liaparo tsa bochaba 'me letsatsi lena le ne le tletse melilletsane le thabo e kholo.

Motlotlehi Letsie III ke mora oa pele oa bafu Motlotlehi Moshoeshe II le Mofumahali 'Mamohato Bereng Seeiso. O hlahetse Sepetleleng sa Morija ka la 17 Phuptjane 1963 'me a rehoa Mohato Bereng Seeiso.

O ile a hlapantšoa ho nka kano ea Ofisi ea Botlotlehi ka 1996.

A re phelele Rabasotho! 



Basebetsi ba LEWA ba keteka letsatsi la tsoalo ea Rabasotho.

Sechaba sa Quthing se buisana le Lekhotla

Lekhotla le nen le ruta baji ka tšebeliso e ntle ea motlakase, bohlokoa ba ho nka karolo litabeng tsa taolo, le methati e lokeloang ho lateloa ha moji a teka tletlebo ea hae ho Lekhotla.

E 'ngoe ea boikarabello ea Lekhotla la Taolo ea Motlakase le Metsi (Lekhotla) ke ho tsebisa sechaba ka mesebetsi ea lona. Ele ho phethisa sena, Lekhotla le ile la etela boemeli ba sechaba sa Quthing ka la 28 Phato, monongoaha. Kopano ena e ile ea etsoa ka sebopeliso sa pitso, 'moko-taba oa kopabo e ne e le ho ruta baji ka tšebeliso e ntle ea motlakase, bohlokoa ba ho nka karolo litabeng tsa taolo, le methati e lokeloang ho lateloa ha moji a teka tletlebo ea hae ho Lekhotla.

Lekhotla le ne le emetsoe ke Ofisiri ea lefapha la Litaba tsa Baji Mofumahali 'Machabalala Koatsa le Mofumahatsana 'Makhosi Makhobalo ele Raliphatlatso. Sechaba se ne se emetsoe ke boemeli ho tsoa ofising ea 'Musi oa Setereke, Marena, Mak'hanselara le ba bang.

Lekhotla le bohle ba neng ba le teng phuthehong ba ile ba amoheloa ke Mofumahali 'Mabasia Lepota ea neng a tsoere molepo sebakeng sa Ntate Seeiso Moshoeshe e leng 'Musi oa setereke sa Quthing. Bohle ba ile ba amoheloa ka mantsoe a hore ba thehe tsebe haholo ho utloa ka tsa mesebetsi oa Lekhotla, e le hore batle ba ruoe tsebo.

Ha a hlalosa sepheo sa leeto leo Mofumahatsana Makhobalo o itse mesebetsi oa Lekhotla hará e meng ke ho behela ba fuoeng mangolo a tumello lipehelo tsa phano ea litšebeliso molemong oa litšebetso tse tsoileng matsoho tse fetisetsoang ho baji.

Lekhotla le hlalositse tokomane ea Lipehelo tsa Boleng ba Litšebeliso (QOSSS) eo ba litsi tse fuoeng lilaksense li lokelang hore li sebetse ba ipapisitse le eona. O boletse hore mesebetsi o mong oa Lekhotla ke oa ho

beha litheko tsa motlakase le metsi. Hape mesebetsi o mong ke oa ho rarolla litletlebo tse sa kang tsa rarolloa ke setsi se fanang ka litšebeliso.

Sechaba se ile sa fuoa monyetla oa ho teka maikutlo a sona holima molaetsa o fetisitsoeng ke Lekhotla, le liqholotso tseo ba kopanang le tsona malebana le litšebeliso tse laoloang ke Lekhotla. Taba ea pele e ileng ea hlalisoa ke sechaba e bile hore baji ba Quthing ba na le maikutlo a hore litaba tsa phepele ea motlakase metseng ha li sebetsoe ka tsela e nang le ponaleto kaha ho tloloa metse e meng, ha e meng e hokeloa.

Lekhotla le ile la koptjoa ke hona hore le hlalose karolo eo le e bapalang litabeng tsena. Lekhotla le ile la arabela ka hore qeto holim'a metse e hokeloang motlakase selemo le selemo, ke khetho ea 'Muso ka Lekala la Matla, Metsi le Bolepi (MEMWA). Lekhotla lona eba joale kamorao ho moo, le laola likamano lipakeng tsa baji le ba fanang ka litšebeliso, ele hore litšebeliso li fanoe ka boleng bo nepahetseng.

Taba e 'ngoe e ileng ea hlalolla e bile ea hore sechaba se na le tumelo ea hore maikutlo a sona a qheleloa ka thoko ha Lekhotla le etsa qeto holim'a litheko tsa motlakase le metsi. Mofumahatsana Makhobalo o ile a supa hore methati eohle e lateloang ke Lekhotla ke methati e phatlalletsoang bohle, ha ho ntho e etsoang ka lekunutu.

A supa hore mehato eohle ea methati e lokeloang ho lateloa e fetisetsoa sechabeng ka mekhoe eohle ea liphatlatso. E le ho netefatsa hore maikutlo a sechaba a ea mameloa, bohle ba bontšitseng ka mongolo hore ba ka phatlalatsa maikutlo a bona ka pele ho Boto ea Lekhotla le bafani ba litšebeliso, ba lumelloa ho etsa joalo. Lekhotla le hlalositse hape hore taba e 'ngoe e



Ba neng ba nkile karolo phuthehong ea Quthing.

12 lekoloang ntle le maikutlo a sechaba, ke hore na sechaba se tla fumana litšebeliso ka boleng bo nepahetseng. E 'ngoe ke hore na setsi sa phano ea litšebeliso o se tla atleha ho fana ka litšebeliso ha litheko li se li kene tšebetsong.

Bothata bo bong bo ileng ba hlalisoa ke sechaba e bile hore litšebeliso tsa motlakase li khaotha ho se tsebiso e entsoeng, 'me seo se senya thepa le hona ho senyetsa bahoebi khoebo.

Lekhotla le ile la hlalosa taba ena ka hore ho latela tokomane ea lipehelo e seng e hlalositsoe, LEC e lokela ho

tsebisa sechaba ka ho khaotha hoa litšebeliso matsatsi a mabeli pele ho phethahatso ea taba ena. Lekhotla le boetse la hlalosa hore ka nako e 'ngoe litšebeliso li ka khaotha ntle le morero oa mang kapa mang. Ha boemo e le bona, litšebeliso li lokela ho khutlisetsoa lihoreng tse mashome a mabeli a metso e mene tsa letsatsi.

Mofumahali Lepota o ile a phethela lipuisano ka hore supa hore lipuisano tsa mofuta ona li molemo sechabeng hobane sechaba eba se tla utloisisa litokelo le boikarabello ba sona. O ile a etsa kopo e khethehileng ho boemeli ba sechaba bo neng bo le teng hore e se e ka litaba tsena li ka fetisetsoa sechabeng ka makhetho



Ke 'nete hore motlakase o bohlokoa haholo maphelong a rona ka kakaretso. Ho tloha nakong eo re tsohang, ho fihlela ha re robala, re sebelisa motlakase. Ka lebaka lena, ke ntho e sa makatseng hore re o sebelisa ntle le ho se nahane mathata a ka bakoang ke ho o sebelisa hampe, 'me oa hlalisa batho kotsi kapa hona ho ba bolaea.



Lekhotla la Taolo ea Motlakase le Metsi Lesotho le na le bokirabello ba ho hlokomelisa sechaba ka tšebeliso e mope ea motlakase e ka bakang likotsi.

LEWA kopanong ea selemo, ea borobeli ea ESAWAS

Kopano ena ea matsatsi a mabeli e ne e tsepame holima 'moko taba oa ntlafatso ea tsamaiso ea taolo 'me litaba tse ileng tsa tšohloa li kenyeletsa tšebetso ea molao, boikemelo ba litho tsa Boto, methati ea boipiletso, boikarabello ho ba nang le kobo ea bohali le metheo ea meralo bakeng sa malaoli.

Lesotho le ile la emeloa ke Lekhotla la Taolo ea Motlakase le Metsi Lesotho (LEWA) 'me le ile la ba hara linaha tse 11 le baeti ba 50 ba bileng teng kopanong ea Mokhatlo oa Taolo ea Metsi le Bohloeki Tikolohong ea Afrika e Boroa le Bochabela (ESAWAS) ho tloha ka la 20 ho isa ka la 22 Phato 2014 Maputo, Mozambique.

Moifo oa LEWA o bileng teng kopanong eo o ne o bopiloe ka Molula Setulo oa Boto ea LEWA, Professor Francina Moloi, Mookameli oa LEWA Assoc. Prof. Ntoi. Rapapa le Mookameli oa Lefapha la Litaba tsa Metsi, Monghali Frank Seboko.

Mohoo oa kopano o ne o le holim'a ntlafatso ea tsamaiso ea taolo ea litšebeliso. Kopano 'me e ne e hlophisitsoe ke Lekhotla la Taolo ea Metsi la Mozambique (CRA) le ESAWAS. Ketsahalo ena e ile ea buloa ka molao ke Motlatsi oa Letona la Mesebetsi ea Sechaba le Bolulo la Mozambique, Monghali Cadmiel Filiane Muthemba.

Litho tsa ESAWAS kaofela ha tsona li bile teng

phuthehong ena ho kenyeletsoa le LEWA. Litho tse ling tse bileng teng e bile Lekhotla la Taolo ea Matla le Metsi Tanzania (EWURA), Lekhotla la Taolo ea Bafani ba Litšebeliso Rwanda (RURA), Lekhotla la Sechaba la Phano ea Metsi le Litšebeliso tsa Likhoerekhoere la Zambia (NWASCO) Boto ea Lekhotla la Litšebeliso tsa metsi Kenya (WASREB) le CRA.

Ba bang ba bileng teng e bile mekhatlo ea hona moo Mozambique e kang FIPAG, AIAS le e meng.

Kopano ena ea matsatsi a mabeli e ne e tsepame holima 'moko taba oa ntlafatso ea tsamaiso ea taolo 'me litaba tse ileng tsa tšohloa li kenyeletsa tšebetso ea molao, boikemelo ba litho tsa Boto, methati ea boipiletso, boikarabello ho ba nang le kobo ea bohali le metheo ea meralo bakeng sa malaoli.

Tse ling tse ileng tsa tšohloa li kenyeletsa tsamaiso ea litšebeliso tsa bohloeki, tsamaiso ea literopo tse nyane le tse ho ithuta ka tšebetso e ntle litabeng tsa tšebetso ea taolo



Ho bohlokoa hore batho ba tlahele marang-rang a likhoerekhoere a senang likoahelo ho WASCO kapa LEWA e le hore likotsi li se etsahale.



Lifate tse melang tlas'a lithapo tsa motlakase li ka khaola phephelo ea motlakase.



Ke taba ea bohlokoa ho sebelisa metsi ka hloko e le hore a polokelong a se fele kapele.



Karolo ea marang-rang a phephelo ea metsi a WASCO Maseru.



U tšoenyehile ka Boleng ba Metsi?

Hape le...

- *Likhakanyo tsa khokelo tsa metsi • Khokelo tsa metsi*
- *Khaolo ea phephelo ea metsi • Khokelo*
- *Khaolo ea phephelo e bakiloeng ke bothata
ba marang-rang a WASCO?*

Lekhotla la Taolo ea Motlakase le Metsi (LEWA) le hlahisitse litokomane tse 'maloa tseo ka tsona taolo ea metsi le likhoerekhoere e tlang ho phethahatsoa ka tsona. Ka hara tse ling, Lekhotla le hlahisitse tokomane ea Lipehelo tsa Boleng ba Litšebeletso le Phephelo tsa Metsi le Likhoerekhoere (Urban Water Quality of Service and Supply Standards - QOSSS). Tokomane ena molemo oa eona ke hore K'hamphani ea Metsi le Likhoerekhoere (WASCO) e fane ka litšebeletso e ipapisitse le lipehelo tse behiloeng tse kahar'a eona. WASCO e lebelletsoe hore ebe e qalile ho kenya lipehelo tsena tšebetsong ho tloha ka Mphalane 2013.

*Molemong oa litšebeletso
tse phethahetseng holim'a metsi
le likhoerekhoere literopong.*

Ho fumana tlhakisetso e felletseng, ikopanye le rona: 7th Floor, Moposo House, Kingsway, Maseru, Lesotho

Tel: +266 22 312479 • Fax: +266 22 315094 • Email: secretary@lewa.org.ls

